

十不善業道經

馬 鳴 著 薩 集

宋西天三藏朝散大夫試鴻臚卿宣梵大師日稱華奉 詔譯

此十不善業道體性是罪若樂求佛道者遠離彼過當如是知何等爲十所謂身業三種語業四種意業三種於是義中今當解說身三種者殺生不與取欲邪行語四種者妄言綺語兩舌惡語意三種者貪瞋邪見云何殺生謂於有情率先見已次審其名決定欲殺動身施作斷其命根如是五緣次第具足成殺生罪定感彼果云何不與取謂於他物先窺覘已而起審慮決定欲取動身所作即盜其物具足五緣成不與取罪云何欲邪行於此罪中而有四類非處非時非分非徃非處者謂於諸佛菩薩經像和尚闍梨父母所止

或相隣近皆所不應非時者謂於晝日或偶月事懷妊新產彼不樂欲及病惱等或受淨住八關齋戒皆非其宜非分者謂於面門及以非道童男處女自執持等俱不應作非徃者謂於他妻及比丘尼親族異趣及街賣等設自境界作非梵行所不應理如上當知云何妄語謂於見物或他遺墜審知是已決定而取彼若尋求起虛妄說具足五緣成妄語罪云何綺語謂於他人以染污心增飾其非對彼而說云何兩舌於他所有隱密等事以非理言而作離間云何惡語謂於貪欲和合事相以雜染言厲聲而說云何名貪於他財富及彼受用起愛樂心非理希望云何名瞋謂於有情起忿恚心而作損惱及捶打等云何邪見謂無施等無彼後世無供養事無佛

世尊聲聞緣覺無罪無福無所作業無所受
報如正法念處經及餘經說此十不善業道
是地獄因於十善業道應當修學則於惡趣
永不墮落

十不善業道經

音釋

塑音素埏土象物也切噴普悶切銀胡關切腕烏貫切釧手腕也切
樞緇切玳玳瑁切瘡瘡於金切瘡瘡不能言也樺胡化切
鐸達各切瘡瘡於金切瘡瘡不能言也樺胡化切
名胡關切瘡瘡於金切瘡瘡不能言也樺胡化切